

distantibus inaequaliter sublonge pedunculatis erectis v. nutantibus subcompositis laxis $2\frac{1}{2}$ — $1\frac{1}{2}$ poll. alt.; pedunculis compressis infra apicem dilatatis, laevibus, altero 4—2 poll. longo, altero multo brevioribus; paniculae ramis erecto-patentibus validulis ad angulos subscabridis $2\frac{1}{2}$ poll. long.; bracteis secundariis linearibus angustis ramos subaequantibus; spiculis ferrugineis spicatum dispositis, masculis praevalidis oblongo-linearibus leviter compressis obtusiusculis $2\frac{1}{2}$ lin. long.; squamis membranaceis ferruginescentibus v. pallide fusco-purpureis e carina mucronulatis: foemineis suborbiculatis breviter acutatis, masculis lineari-oblongis obtusiusculis; car. eburnea magna nitidula squama parum brevior sesquilineam longa late ovata obsolete trigona umbonato-apiculata obscure foveolato-tuberculata, tuberculis hirtellis; perigynio interiore caryopsi arcte adhaerente eaque concolorato (quasi duplici) triangulari trilobo, lobis dentiformibus adpressis, a basi patelliformi obtusangula subdisiuncto; perigynio inferiore in squamarum fundo remanente cyathiformi externe fusco interne margineque albido. — Cum specie praecedenti in viciniam *S. elatae* Thwait. ponenda. — Schw. hb. n. 2474.

Africa centr., Agada terr. Djur.

11. *S. racemosa* Poir.

Herb. Schweinf., sine nro.

Africa centralis.

De Hypothallo notula.

Scriptit W. Nylander.

Jam in notula circa Lichenes vitricos (in Flora 1879 pp. 303, 304) animadverti, prothallum cito transire in hypothallum neque ambos limite ullo definiendo separari; prothallus hypothalli sistit initium vel prima stamina, qualia a spora germinante emittuntur.¹⁾ In hoc autem capite maxime notatu digna videtur natura peculiaris elementorum anatomicorum filamentiformium, quae prothallum hypothallumque constituunt;

¹⁾ Terminus Prothallus sic sensu maxime legitimo adhibetur. Tum vero Prothallium dicenda est in Filicibus formatio cellulosa archegoniophora (vel antheridiophora), ne ambo hi termini confundantur sicut fit hodie apud quosdam auctores parum attentos.

sunt enim haec filamenta mox et semper Lichenino pro longe amplissima parte composita atque vi singulari adhaesiva pollentia, ita ut fortissime substrato adglutinentur. Simul observandum est, eadem tunc substrato applicari tota sua longitudine, aut plus minusve radianta et inter se lateraliter juxtaposita aut in membranulam applanatam connata; perpetuo firma et elastica in vegeto statu, in sicco (aeque normali) indurata: nihil commune habentia cum hyphis Fungorum vel protohyphis (promycelio) eorundem. Fundamentum thalli sistit stratum illud hypothallinum substrato arcte agglutinatum, tenuissime expansum, jam dendritico-divergens vel aliter effiguratum, jam magis continuum ambituque solum subtiliter subplumoso-radians; atque super idem stratum nasci demonstravi granula cellulosa, quae offerunt et conformant cetera elementa pertinentia ad structuram plenam thalli cujusvis. Inter haec elementa anatomica sunt Gonidia. Ita primordium thalli ipsius efficitur granulo celluloso, quod supernascitur hypothallo juvenili; saepe vero granula talia plura super eundem hypothallum simul advenientia conspiciuntur. ¹⁾

Valde absonum est loqui, ut mos est in schola Schwendeneriana, de hyphis prothallinis involventibus, quae scilicet (secundum conceptionem fabulosam) Protococcus aliasve Algas gonidioideas insidiosae consecrarentur et velut in laqueis vel telis araneorum involverent, nam cuique res sincere examinanti aperte patet, elementa prima thalli hypchoidea, prothallina et hypothallina, non occupari nisi fixura solida Lichenis in superficie substrati, quod ille inhabitat, neque ulla involvendi facultate instructa esse neque ullam ejusmodi quidem intentionem apud eadem unquam observari. Elementa filamentiformia rigescentia, quae sola adsunt, tali operae minime conveniunt et, quod non minus grave habere fas sit, nihil in his casibus involvendum

¹⁾ Lichenes duplici vitae modo gaudentes, vita videlicet aquatili (vel plantae aquosae madidae, vegetae) et vita siccitatis (vel lethargica), necessario organa habent huic naturae duplici perenni accomodata et structuram eidem conformem, recedentem a structuris apud alia vegetabilia obviis. Jubentibus his usibus vitalibus explicari debeat praesentia lichenini imputribilis praevalens in texturis lichenicis, quae inde facile siccantur, aequae vero facile in defactae revigescunt, atque chlorophylli aut phycochromatis gonidiorum seu gonimiorum involuti in cellulis et syngonidiis aut syngonimiis, ut ita munita satius se defendant et ut contra variationes summas temperaturae et contra desiccationes vel ab ardore solis vel a vehementia ventorum effectas impunissime resistant.

in natura adest, nullum vestigium protococcoideum vel aliud heterogeneum quodcumque hic intervenit. Imaginationis delirantis meram prolem sic sistit fabula involutionis, quae locum non habet et locum habere non potest.

Hypothallus primam basin sistens thalli est coloris albi vel albidi et in aliis obscuratus vel nigricans. In thallis crustaceis saepe demum haec basis destruitur confunditurque cum strato medullari superposito, at in ambitu magis persistens invenitur limitationesque hypothallinas format (plerumque obscuratas), quae individua Lichenum inter se circumscribunt. In montosis, ubi haec vegetabilia optime vigent, haud raro occurrunt individua annosa saxicolae contigua, quae extensionis nisu limitibus utrinque se repellunt et impetu hoc in illis limitibus thalli jugose elevati observantur, nam individua singula contermina pro loco, quem occupant, h. e. pro vita vel pro focus ita enixe luctantur atque in ipso limite (ubi vita maxime activa) nova incrementa thallina potissime accedunt.

Elementa filamentosa prothalli et hypothalli sunt tenuissima et vulgo vix crassitiem 0,003—0,004 millimetri superant; sed saepissime plura lateraliter connata discernuntur aut demum membranose in stratulum simplex applanatum coalita. In diversis autem typis genericis [(ut dicitur) varias mutationes ostendit evolutio ulterior hypothalli, prout fixuram gompho constituit (ex. gr. in *Usneis*, *Umbilicariis*, etc.), aut in aliis evanescit vel obliteratur (in *Cladoniis*, *Cladinis*, *Stereocaulis*, *Collematibus*, etc.), aut in aliis cum rhizinis confunditur, quae omnes differentiae seorsim sunt tractandae. Deesse denique hypothallus videtur in Lichenibus multis infimis (exemplo citetur *Urwella* Nyl. in *Flora* 1879, p. 359).

Philosophiae botanicae considerationem offerat similitudo texturae anatomicae inter hypothallum substrato applanatum agglutinatumque et rhizinas thallorum a substrato liberorum versusque substratum directas. Indicare liceat simul analogiam morphologicam, quae interest inter thallum et apothecia, nam convenientia certa physiologica anatomicaque non deest inter hypothallum et hypothecium, nec inter medullam et thalamium, nec inter gonidia et sporas, nec inter stratum corticale et epithecium.

Redacteur: Dr. Singer. Druck der F. Neubauer'schen Buchdruckerei
(F. Huber) in Regensburg.

ZOBODAT - www.zobodat.at

Zoologisch-Botanische Datenbank/Zoological-Botanical Database

Digitale Literatur/Digital Literature

Zeitschrift/Journal: [Flora oder Allgemeine Botanische Zeitung](#)

Jahr/Year: 1879

Band/Volume: [62](#)

Autor(en)/Author(s): Nylander William

Artikel/Article: [De Hypothallo notula 574-576](#)